

Xomorrok irabazi du Bertso Paper Lehiaketa

Sagardo Egunaren XXV. urteurrenarekin bat egin du aurtengo Bertso Paper Lehiaketak. Hortik lehiaketarako gaia: “Sagarrondotik dator sagardoa”. Sei izan dira aurkeztu diren lanak eta honakoan ere, Xabier Aranburu Muguruza “Xomorro” usurbildarra izan da garaile (egun, preso dago Herrera de la Mancha). “Xomorrok” 200 euro eta oroigarria jaso du. Bigarren Julian Albistur Aranburu errenteriarra izan da; 150 euro eskuratu ditu. Hirugarrena ere Errenteriakoa da, Iñigo Legorburu Arregi, eta 100 euro jaso ditu. Hementxe dituzue Xomorrok idatzitako bertsoak.



JAIETAKO BERTSO SAIDAN EGIN ZEN SARI BANAKETA.

“Sagarrondotik dator sagardoa”

Sagarrondoaren soina
Dotore udaberritu
Adarretan hosto obalak
Lore zuriz erne ditu.
Eguraldia xurgatuz
Koxkorrak zaizkio gehitu
Haize, euri eta eguzkiaz
Egiten baitira hornitu
Denboraren poderioz
Adarrak dira uztaitu
Zamaren zamaz sagarrak
Ezin direla kabitu
Helduenak lurreratuz
sagarrondoa erditu
Bekatuaren fruitua
Jan gabe ez gaitzen gelditu.

Sagarrondoan orpoak
daude sagarrez beteta
eta baserritarrak prest
dira egiteko bilketa
egitekoari jarritz
berebiziko arreta
esperientzia lagun
bihurtu zaie olgeta
sagarrek galdu ez dezaten
kalitatea kolpeka
kizkiaz egin diete
ziztada baten fereka
ardura handiz uzteko
zakutan ongi gordeta
sagardoa egiteko
lehengai dira eta.

Sagar garbi ederrekin
Kirikoketa hasi da
Mazoen golpe lehorrez
Txirtxilaturik neurriara.
Gutziz desitxuraturik
Eta galdurik distira
Sofrimenduaren sokak
Jada ezin ditzake libra
Tolare bihozgabeak
Hartua baitu segida
Sagarren bihotz-arimak
Tinko estutuaz di-da
Patsa ondo xehatu arte
Ez du izango gupida
Mama gozoa negarrez
Txorrorean ageri da.

Muztioa txorrotadan
Badoa kupelerantza
Lau-bost hilabeterako
Errespetuz usantza.
Kupelaren besoetan
Etzaio faltako dantza
Soinean izango baitu
Hartziduraren arantza.
Bi irakinaldirekin
Datorkio akabantza
Jada ondo gorpuzturik
Joana zaio balantza
Usain eta zapoarak
Baieztatzen dute, antza
Sagardo bikain-bikaina
Izango den segurantz.

Txotx garaiak dizu arindu
Kupeleko martiritza
Ilunpeko zoritxarra
Bihurtu baitizu ditxa.
Ireki dizutenian
Askatasunaren giltza
Ikustekoa zen zure
Abiadura bortitza
Baso ertzean lehertuz
Ospatzen duzu garaitza
Txinparta darizularik
Kabitu ezinik zabilta
Bihotzak dantzan jarriaz
Jolas ederrean hitza
Zu gabe ai ze tristea
Litzatekeen bizitza.

Txotx bolada pasa arren
Sortzen darraizu lilura
Usain eta zapoarak
Jo dizutelako muga
Bospasei gradu artean
Ereduaren modura
Botilaratu zaituzte
Eramanez merkatura
Iaz Madrilgo perian
Eduki zenun mentura
Aurten aldiz Katalunian
Sustatuz euskal kultura
Kalitatea jarriaz
Bezereoaren eskura
Gure arbasoen sustraiak
Zabal ditzazun mundura.

Sagardo eguna zela
Ezin inolaz ahaztu
Kolore ederrarekin
Botilan zeunden han justu
Kortxo askatuz gero
Edozertarako prestu
Lotsa gutxikin baitzinen
Baso batean biluztu
Eskuan goxo hartuta
Tragoan zintudan hustu
Hura zen hura zirrara
Gorputz osoan ze gustu
Probatu izan ez bazintu
Ezingo nuen sinistu
Bihotzean baitzenidan
Maitasun argia piztu.

Zurekiko maitasuna
Sutsu dezadan seinala
Izan baita hogeitabost
Urteko ezkontza formala
Zintzoa izan natzaizu
Fidela eta leiala
Noizbait harrapatu arren
Mozkor bihurri petrala
Harro diotsut oraindik
Hauxe gertatzen zaidala
Maitekiro zu basotik
Neurrian edan ahala
Pasioarenugarra
Etortzen zait berehala
Zure ezagutza egin
Nuen unean bezala.